

《Ella 重生記》

[第一場 ↓ 孩子未來方程式]

場景：講座

人物：麥博士、孕婦 Alice、孕婦 Brenda、孕婦 Connie、孕婦 Daisy(Ella 母親)

(研究助手在準備好講座需要用的文具、報名表和單張。有孕婦已經到達。)

Brenda： 喂！ Alice！ 你都嚟左呀！

Alice： 噢！ Brenda! 係呀！ 我本來 waiting list 架咋！ 點知琴日通知我話會加位，所以至有得嚟咋！

Brenda: 麥博士 D 講座出左名好 FULL 架啦，遲一分鐘報名都有位呀！

Connie： 咁又有咁誇張，我開始接受報名之後 1 個鐘都仲報到名。

Alice： 咁你都好好彩喎！

Daisy： 請問呢度係唔係麥博士個講座呀！

研究助手： 係呀，請隨便坐。

Daisy： 唔該。(找座位坐下)好彩冇搞錯地方，呢度真係好鬼吊腳，[又有地方泊車，落左的士仲要行條大斜路，]真係劫死人....

Alice： 你個肚甘大仲走來走去，又真係好辛苦，你個預產期係幾時？

Daisy： 下個月初。今次係我第一胎，唔知道會唔會好痛，宜家都有 D 擔心。

Brenda： 哎呀你開刀生呀嘛，咁就唔會痛啦，順便揀個好嘅時辰開刀，咁樣 BB 個八字又會好 D，第時讀書工作拍拖買樓買車結婚生子樣樣都順利 D 架！

Daisy： 但係外國有 D 研究話自然生產嘅 BB 仔大個左會聰明 D 勇敢 D 積極 D 獨立 D 喎，八字呢 D 野信唔信得過架？...我都係信科學多 D，費事第日個女大個左走嚟怨我！

麥博士： 大家好！（各孕婦拍手）歡迎各位嚟到我地嘅研究中心參加『孩子未來方程式』講座，我係呢個研究中心嘅研究總監，亦都係今日嘅講者麥博士。今日，我會同各位介紹本研究中心獨創嘅「孩子未來發展藍圖」。

(Powerpoint Projection, screen 出現發展藍圖的圖像。)

首先，我想糾正大家一個非常錯誤嘅觀念，就係好多人成日講嘅「贏在起跑線」，(指著黑板上寫著的口號「贏在起跑線」)我需要話俾大家知，呢個觀念係完全錯嘅！

(Powerpoint 裡「贏在起跑線」的字句上出現了一個大交叉)

因為，淨係「贏在起跑線」係完全冇意義架！人生係一場長跑，我地嘅子女要成功嘅話，不單止要贏在起跑線，而且過左起跑線之後都要一路贏，一路贏，一路贏，贏到去人生嘅終點！咁樣先至算係成功，先至係人生嘅大贏家！

(麥博士自己拍手，示意聽眾也要一起拍手。)

古語有云：『3 歲定 80』。根據我多年嚟嘅研究顯示，家長最好喺小朋友三歲前帶佢地參加唔同嘅課外活動，而且最起碼要五樣唔同嘅課外活動。你地可能會問，點解起碼要五樣呢？的確，係有 D 奧妙！

教育家講求 德、智、體、群、美五方面嘅教育，我國幾千年前亦已經有「易經」講求金、木、水、火、土五行嘅調和，所以，課外活動最起碼要

有 5 樣，或者以五嘅倍數增加，即係，10 樣或者 15 樣，咁樣小朋友就可以得到生理同心理平衡嘅發展。當然，呢 D 活動最好係越早參加越好，就算只係啱啱出世都可以參加。

Daisy：哇！乜原來咁多嘢要唸架！我仲以為就咁養大個小朋友就得添！

麥博士： 呢位媽媽，你太天真啦！[好多家長宜家都會帶小朋友參加學前準備班，] 呢 D 課程係非常重要架，因為入到好嘅學前準備班，先有可能考到 band1 嘅幼稚園，然後先至有機會入到 band1 嘅小學，再入到 band1 嘅中學，跟住先會有希望考到中大，科大或者港大，讀熱門嘅科目，搵到好嘅工作！！呢 D 咁基本嘅道理，我相信大家都應該好明白。

（拿起傳單向孕婦派發）我地中心都有一 D 精心設計嘅課程俾初生到三歲嘅小朋友參加，呢 D 課程都可以幫助你地嘅小朋友成為兒童界最精英嘅兒童，希望到時可以見到大家。大家有冇問題想問？

Alice：嘩，點解會有咁多嘢要學架！淨係帶個小朋友四周圍去上堂，都已經會劫死人啦！

Brenda：死啦，我只係報 BB 報左 3 樣課程，英語，游水，同 畫畫，好似唔係好夠喔...

Connie： 博士，我想問咁胎教方面呢？你地中心有冇胎教嘅課程或者服務呢？

麥博士： 呢位媽媽嘅問題問得非常好！冇錯，胎教係極之重要的，如果媽媽不注重胎教，孩子出生後的培育成效將會大打折扣！甚至係徒勞無功！

Daisy： （站起來）哎呀！不是吧！我有做任何胎教啊！我過多兩個星期就生啦！點算呀！

麥博士： 咁樣嘅話，我只能夠話，祝你好運，將來你同你小朋友將會需要比別人努力 10 倍，甚至 100 倍，先有可能唔被淘汰...不過，如果你唔想情況太惡劣，你可以考慮一下報我地嘅十天胎教精讀班，可能仲嚟得切嘅...

Daisy： 下？十天精讀班？胎教都有得精讀？哎呀！我個肚好疼啊！！（差點倒下）

孕婦們： 哎呀！你沒事呀嗎？？（有些擔心）

[Alice： 佢會唔會生得啦！不如 call 車送佢去醫院啦！（Alice 幫忙抹汗，Brenda 搽藥油）]

麥博士： [冇事嘅，冇事嘅。] 大家冷靜 D……我地今日講座結束啦。（收拾東西離開。）

Connie： 麥博士，我想問個十天胎教精讀班 full 左未？我想報名，學費我可以即刻交 cash。

麥博士： 好！你跟我嚟。（Connie 跟麥博士離開。）

（後面的人打電話，忙忙碌碌，慌慌張張離開。）

[第二場↓見家長]

地點：學校課室
中二。

人物：母親，Ella，班主任。

時間：13 年後，Ella

班主任： Ella Chan Please!

Ella 媽媽： 係老師。

班主任： 依？陳太？Ella 呢？

- Ella 媽媽： 佢喺課室出面食緊早餐。
- 班主任： 叫佢入埋嚟呀。
- Ella 媽媽： 今日見家長咋嘛，又唔係見學生，你星期一至五都見到 Ella 架啦，有咩要同佢講都講曬架啦。一係咁，如果你驚會有唔清楚，我可以錄音，咁 Ella 之後可以聽返。
- 班主任： 冇需要錄音啦，Ella 宜家係出面，係唔係？我地等佢食埋早餐先，我宜家見左下一個學生先啦。
- Ella 媽媽： 下?! 唔得! 我 Ella 今日個 schedule 已經 full 曬，一定要準時走架! (Ella 衝入)
- Ella: 媽咪! 我枝唇膏呢? 我食完野唔補返 D 唇膏點見人呀?
- Ella 媽媽: (在手袋裡找唇膏，一邊講電話) 啊! 你咁快食完野啦! 拿, 唇膏呀!
(Ella 坐在媽媽旁邊，拿小鏡子出來，開始塗唇膏，化妝，整理頭髮，然後玩電話。)
- Ella 媽媽： 老師，而家可以開始傾咯呵?
- 班主任： Ella 呢個學期嘅成績都唔算太差，主要係數學科需要努力一 D，同埋 discipline 方面要注意一下。數學科老師話 Ella 所有數學測驗卷都有家長簽名，而且警告左好多次都唔肯簽返嚟。我想請問 Ella 其實有無俾過 D 卷你簽?
- Ella 媽媽： 有呀! 但係唔合格啫! 點簽呀? 佢小學唔係咁架，D 數學好地地架，都唔知點解上左中學之後數學先至唔合格?
- 班主任： 係，明白。Ella 嘅數學成績的確一直退步緊，而且經常欠交功課，令到平時分都好差。其實數學科老師已經安排左 Ella 下個學期放學後上數學輔導班，同埋另外加多左一 D 數學練習俾 Ella，希望幫 Ella 盡量追番 D 進度。不過，請家長都盡快補返 D 簽名。
- Ella 媽媽： 老師呀，Ella 欠交功課係因為學校冇人提佢交呀!!! 你地學校冇幫學生準備功課袋，我個工人執書包先至會執漏架咋! 仲有呀，我聽朋友講，外面 D 學校 D 班主任唔知幾盡責，同家長開個 whatsapp group, 每日都會有功課提示，測驗提示，好好 service 架! 唔該你地檢討下啦!
- 班主任： 多謝陳太太意見，我地會向學校反映。不過學校嘅規矩係家長要係每一份測驗卷上面簽名，無論幾多分都要簽.....
- Ella 媽媽： 都話唔合格唔簽咯，50 分都有點見人?
- 班主任： 咁唔知家長希望點樣處理呢.....?
- Ella 媽媽： hmmm...重測、重考囉，佢考返合格我就簽。
- Ella： 咩話? 媽咪! 你係唔係傻左呀? 你明知我最憎數學，你宜家叫我重測、重考? 你想虐待我呀?!
- 班主任： 其實重測、重考冇乜可能安排得到，希望 Ella 下學期可以努力 D，追返上嚟。至於 D 平時分，我同數學老師再 check 下。(老師遞上測驗卷、考試卷給 Ella 媽媽簽名。Ella 媽媽不情願地簽了) 唔該囉。
- 班主任： 好啦。講完 Ella 嘅成績，不如我地宜家講下 Ella 嘅 discipline?
- Ella 媽媽： 好呀。不過有件好重要嘅事，我想問左先。學期尾 Ella 會參加個領袖訓練營，5 日 4 夜，我想問個 camp site 請咩人煮飯?
- 班主任： 營地方面會安排供應膳食，衛生和質素方面一向有保證，可以放心。

Ella 媽媽： 拿，我好趕時間，我直接 D 同你講，我同其他家長傾緊夾錢請一個米芝蓮級廚師，確保 D 學生嗰幾日有 D 似樣 D 嘅野食，如果唔係，五日冇野食，我驚會餓死 Ella 。

Ella： 媽咪呀，我搞掂啦！你走得未呀？好悶呀，你又話趕時間？（*站起來準備離開*）

Ella 媽媽： 老師，我遲 D 再聯絡你話你知個米芝蓮廚師嘅資料啦！。
（*Ella 與 Ella 媽媽出。老師收拾東西，離開。*）

[Scene 3 - 宿營之災難]

人物：Ella，Jasmine，Alexis，Katherine，救護人員，班主任，班長(Monica)

（*場景在舞台布幕前發生，布幕後面在轉景。*）
（*同學們和老師到達宿營營地，所有同學都拿著旅行袋。*）

Jasmine： 嘩！好樣衰呀！好樣衰呀！今次個 camp 肯定唔會好玩啦，連個 camp site 阿 sir 都咁唔掂，成舊飯咁！

Monica： 係囉，講野仲好似含住粒欖核咁，我完全聽唔到佢講咩囉！

Katherine： 我淨係聽到一句！佢話所有人每晚都要 9 點鐘熄燈上床訓覺囉，癡線架！

Alexis： 採佢都傻啦！我今晚打算唔訓架！

Jasmine： 咁，你有冇帶電筒呀？

Alexis： 冇啲！

Katherine： 用手提電話個電筒得唔得？
（*Ella 拉著她的超大行李來到。*）

Jasmine： 嘩！Ella！你南非動物大遷徙呀？

Monica： Ella, 你頭先點樣上旅遊巴架？

Ella： 我工人姐姐幫我架嘛。
（*班住任到，同學整齊排隊。*）

班主任： 好啦，各位同學，對於剛才營地負責人嘅講解有冇問題？（*同學搖頭：冇！*）如果有問題，宜家你地先返去自己嘅房間，整理一下個人物品，大約 30 分鐘之後就去飯堂集合，準備食 lunch。

Ella： Miss Wong, 我有問題，我件行李好重，呢度又有 lift 搭，我間房係 3 樓，我唔夠力搬上去，可唔可以搵工人幫我？

班主任： Ella, 呢個係領袖訓練營，冇工人架，你要帶咁大咁重嘅行李，你就要自己諗辦法。

Ella： 下？Miss Wong 你幫我諗下辦法啦…

班主任： 我宜家要趕住去同營地負責人開會，你同你 D 同學商量下啦。（*老師離去*）

Ella： 下？（*轉頭望向同學們*）喂，你地幫下手啦…我宜家點算呀？

Jasmine: 你點解要帶咁多野啫？自己擺嚟煩。

Ella: 唔關我事架，一日都係我媽咪囉，學校唔準佢請米芝蓮廚師入 camp，咁佢咪叫工人姐姐煮左 5 日嘅食物、湯水同茶點，裝曬入個行李度囉，搞到我
要拎走成十幾件衫同 3 對鞋先擠得落呀…

Alexis: (抱著她的旅行袋) 我自己個袋已經好重, 我啱啱好夠力囉架咋, 我囉唔到其他野架啦。

Ella: 嘍...Alexis 呀! 你好傷我心呀! 枉我成日請你地食野, 到我有難你地一個二個又唔肯幫手! (想哭)

Katherine: 你請我地食野係因為我地借功課你炒咋嗎, 唔包做搬運個嗎!

Ella: 你個 Katherine, 你...你忘恩負義呀你! (幾乎哭出來) 你地全部唔愛我啦!

Monica: 呀! Ella! 我有辦法!! 你分幾次擺咪得囉! 我地仲有成 30 分鐘先食 lunch, 夠曬時間分幾次搬啦! 係咪? 我係唔係好聰明呢?!

J,A,K: 係呀! 係呀! 都係我地個班長最聰明! 咁我地上去先啦! (同學們速速離去)

Ella: 喂! 你班衰人! 你地信唔信我下個月係半島搞嘅生日會唔請你地呀拿?! 喂! 等埋我呀! 冇人性! 好虛偽呀你地!

(舞台上。營地房間裡。Ella 終於拉著行李箱進入, 其他同學在收拾自己的東西, 玩電話, 發短信報平安, 聊天。)

Katherine: 嘩你地睇下! Ella 搬咗件行李上嚟啦!

Monica: Ella 你好犀利呀! 唔洗分幾次都擺都件行李上來! Superwoman 呀! 哈哈!
(Ella 以虛假的笑容回應。放好行李後看見 Monica 從袋裡拿了一些橙出來, 很奇怪。)

Ella: 車! 你地唔好笑我呀! 你地睇下 Monica 帶 D 咩古怪野嚟宿營好過啦! (擺起一個橙) 你幾多歲呀? 仲玩波波呀?! 依? 呢度有個制個嗎! 有咩功能架? 冇反應嘅?! (聞一聞) 哈! 仲成陣橙味...咩嚟架? 奇奇怪怪!

J,A,K,M: (呆了一秒, 不懂反應, 爆笑。)

Ella: (指住 Monica 大笑)
(其他人笑得更厲害, 指住 Ella 大笑)

Ella: (感覺到有點不對勁) 做咩呀你地! 指住我做咩啫?

Alexis: Ella, 呢 D 係橙嚟架, This is an orange!!! 梗係有陣橙味啦!

Jasmine: (一邊笑一邊說話) 喂, 我個肚好痛呀...我支持唔住...夠鐘食 lunch 啦, 快 D 落去啦!

Monica: 拿! 個橙我送你俾你做飯後果啦, 最多一陣教你食啦! (J、A、K、M 笑著離開)

Ella: 喂! 你地唔好走住呀! 喂! (J、A、K、M 已離開) 我想去廁所呀, 個廁所係邊呀?!!

Ella: (望住個橙) 我平日見 D 橙明明係一楷一楷架.....唔理住啦, 都係去廁所先...
(Ella 自己找到廁所)
(Ella 發現自己原來 M 到, 而且面褲原來已經弄髒了, 尖叫, 不知如何是好。)
(Ella 從口袋裡拿出電話, 打電話給媽媽。)

Ella: (用尖銳的聲線, 介乎尖叫與說話之間) 喂! 媽咪!

Ella 媽媽 VO: 喂, Ella? 你到左 camp site 啦? 點呀? D 枕頭同被乾唔乾淨呀? 要唔要媽咪送過 D 乾淨嘅嚟俾你?

Ella : 我 M 到呀！
Ella 媽媽 VO : 下？你話咩話？
Ella : 係呀！我 M 到呀！條褲仲污糟左，好大達呀！
Ella 媽媽 VO : 下？你講多次？咩一達達話？係唔係俾蚊咬到一達達呀？
Ella : 我話我 M 到呀！（激動）點算呀？我有帶 M 巾呀！
Ella 媽媽 VO : 你唔好叫住啦！你有帶咩話？*(斷線)*
Ella : *(嘗試用冷靜的聲音但最後都係尖叫)* 我話我原來 M 到但係竟然冇帶 M 巾而且宜家條白色面褲已經污糟左仲要好大達好核突你叫我點出去見人呀呀呀！！！！
Ella 媽媽 VO : *(已經斷線，沒有回應)*
Ella : 喂？喂？喂？*(看電話)* 冇電？！我頭先影 selfie 仲有電架明明，點解宜家先嚟冇電？點解呀？！天呀！！！！
Ella : 死啦，點算呀，冇 M 巾，條褲污糟左又唔可以行出去，唔通要等佢地四個返嚟救我？但係實俾佢地笑到面都黃喎，頭先個橙已經好樣衰，如果再衰多次，實笑足一世。唔得！我一定唔可以咁冇面！*(Ella 嘗試找其他通道離開廁所，台上暗燈。)*
(舞台前側，樓梯上。Miss Wong、Jasmine、Alexis、Katherine、Monica 在等 Ella。)
班主任： 點解 Ella 咁遲？已經遲左 10 分鐘啦。佢頭先有冇同你地講佢冇唔舒服？
Alexis : 冇呀！其實 Ella 不騾都遲架啦！
Katherine : 佢成日都慢吞吞架啦，可能襯緊衫掛。
Jasmine : 我好肚餓呀，Miss Wong 我地準時到，可唔可以入左去先呀？D 餸就快俾人食曬啦。
Monica : Miss Wong，Ella 冇同我地講唔舒服，不過我地出嚟個陣，Ella 先啱啱搬完行李入房，可能佢要 D 時間執拾個人物品。
班主任： 好啦，你地入去食 lunch 先啦，我去房搵下佢。*(同學離去，老師轉身，見到 Ella 媽媽拖著一個大行李箱到達。)*
Ella 媽媽： Miss Wong！一嚟到就見到你真係太好啦，我個女呢？
班主任： 陳太？你搵 Ella 有咩事？呢個係領袖訓練營，家長唔可以嚟個喎。
Ella 媽媽： 我個女頭先打電話俾我，話唔記得帶野，所以我特登帶過嚟俾佢啫。
班主任： OK。咁麻煩你交低比我，我會交俾 Ella 架啦。
Ella 媽媽： 但係我唔知佢要咩喎。
班主任： ……咁你頭先又話係 Ella 打電話叫你擺野嚟比佢？
Ella 媽媽： Ella 個電話收得好差，窒下窒下，我聽唔清楚佢講乜，之後仲斷埋線，所以我將我諗到佢可能有需要嘅野都全部擺曬過嚟俾佢揀，唔洗走多次。
班主任： 明白。我宜家去搵 Ella 過嚟，我帶你去 office 度等啦。
Ella 媽媽： 唔好啦 Ms Wong，我同你一齊去搵 Ella 啦，佢頭先響個電話度大叫，應該好 urgent。
班主任： 唉，好啦好啦，你跟我嚟啦。
(舞台上。營地房間裡。Miss Wong 與 Ella 媽媽入。)

班主任： Ella！

Ella 媽媽： Ella！？

(Miss Wong 四處找，找不到 Ella。Ella 媽媽也四處找 Ella，在廁所看到地上有血紙巾。)

Ella 媽媽： (拿著紙巾尖叫) 呀！！血呀！！！！！！死啦！我個女冇啦！

班主任： 下？你冷靜 D 先，你邊度搵到架？

Ella 媽媽： 廁所垃圾桶呀！呀，慘啦，慘啦，我一早都話唔好嚟呢 D 乜鬼訓練營架啦，都唔知對升大學係唔係有幫助，但係我個寶貝女宜家遇害啦！我要報警！我要報警！

班主任： 陳太！你冷靜 D 先啦！我地都未搵清楚！你試下再打俾 Ella 先啦。我就問下 office 同門口看更，睇下有冇見過 Ella。(老師打電話，Ella 媽媽也同時打電話)

Ella 媽媽： (只接到留言信箱) Ella，媽咪呀，你唔好嚇媽咪呀，你去左邊呀？我擺左 D 被鋪枕頭俾你呀，仲有電子驅蚊器、電蚊拍、捲髮器、同電動按摩器，你睇下你要邊樣啦，媽咪係你間房等你呀。

班主任： 成個 camp site D 職員都話冇見過 Ella 離開營地，咁佢即係仲係營地入面啦，可能佢一時行錯路啫，宜家係 lunch time，可能佢已經去左飯堂，不如我地過返去搵佢啦。

Ella 媽媽： 我唔去！我留左言話係度等 Ella 架，一陣佢嚟到搵唔到我咁點算呀？

班主任： 咁好，你留係度等，我去飯堂搵佢。

Ella 媽媽： 你都唔準走！我個女宜家生死未卜呀！你係佢班主任，你想走去邊呀？你想逃避責任呀？今次如果我 Ella 有咩事你一定死梗呀你！

班主任： 陳太，我話我去飯堂搵 Ella，我唔係逃避責任呀！

Ella 媽媽： (再打電話) 喂！女呀！媽咪呀！你接電話啦好唔好？(向班主任) 一日都係你唔俾我請米芝蓮廚師入 camp 先至會搞成咁架！

班主任： 陳太，個營地唔係好大，我地好快會搵返 Ella，我相信佢一定會有事。

Ella 媽媽： 有事？宜家廁所有血紙巾呀！有人流血呀！有事！你點做老師架，你點解有好好睇住我個女呀？下？

班主任： 陳太，我有好多學生要照顧，我有可能每分每秒都睇住 Ella。

Ella 媽媽： 拿！你認啦！你認你有盡責照顧我個女啦！我宜家要報警呀！失蹤少女呀！

班主任： 陳太，我地唔可以隨便報警架，宜家我地又有證冇據，而且 Ella 可能根本就係飯堂食緊飯，你都有搵清楚就話要報警，咁樣太唔理性啦！

Ella 媽媽： (再打電話) 女呀！媽咪呀！媽咪之前有聽你講野係媽咪唔啱，媽咪宜家明白點解你唔鍾意返學啦，你個班主任 Miss Wong 真係完全唔掂呀！應變能力同 EQ 都超級低呀！一 D 人性都冇！你快 D 覆返個電話俾媽咪啦！

班主任： 我宜家都明白曬點解 Ella 會有咁嚴重嘅公主病啦。

(班主任收到電話。)

班主任： 喂，係，係，下？OK，OK，好，我宜家即刻嚟。(收線) Ella 宜家係營地 office，你要唔要跟我過去，定係要係度等？

Ella 媽媽： 快 D 行啦，仲講！

(舞台布幕前，布幕後面在轉景。)

(Ella，便利店職員。Ella 用上衣圍在腰間，遮掩褲子後面的污漬，但上衣和褲也有點破爛。)

(Ella 媽媽及 Miss Wong 入。)

Ella 媽媽： Ella！你嚇死媽咪啦！（衝過去拖住 Ella）

班主任： 你係便利店職員？

職員： 係，個細路女冇錢俾，又話自己唔認得路，叫我跟佢返嚟，又話嚟到呢度就會有人幫佢俾錢，我見佢個樣唔似講大話，所以就送佢返嚟囉。

班主任： 佢買左咩，要俾幾多錢？

Ella： 你俾 36 蚊佢得架啦。

Ella 媽媽： 得，我俾。100 蚊，唔洗找啦！

職員： 唔該，咁我走先啦，唔係俾老細鬧。

班主任： 好。唔該囉。（向 Ella）Ella，你點解會偷走出去架？

Ella： 我帶漏左 D 好重要嘅野，電話又有電，又驚俾人知，所以自己爬後門捧牆出去買囉，但係去到便利店先醒起自己冇帶錢…想返轉頭又唔認得路…好彩我仲記得個 camp site 個名。

班主任： 你帶漏 D 乜野咁緊要，要爬後門捧牆出去買呢？

(Ella 不作聲。)

Ella 媽媽： 係囉，你唔好收埋啦，囉出嚟，俾媽咪知工人姐姐執漏左乜野，等我返去鬧佢！

Ella： Miss Wong，你可唔可以應承我唔話俾其他人知？我唔想俾人笑到面黃。

班主任： 好，我應承你。

(Ella 把一直收在身後的一包衛生巾拿出來。)

(Ella 媽媽及班主任望著那包衛生巾，燈暗。)

[Scene 4 - 痛定思痛]

人物：Ella，媽媽，工人姐姐 Silvia

(舞台布幕打開，Ella 家。工人在打掃，Ella 媽媽和 Ella 各自拖著一個大行李箱入。)

Silvia： Mom! Ella? Why come back so soon?

(工人姐姐馬上把拖鞋拿給 Ella 和 Ella 媽媽，幫 Ella 除鞋，著拖鞋，幫 Ella 拉椅子，讓她座好，然後快速地從廚房拿兩杯熱茶和點心出來。)

Ella 媽媽： (工人一邊做事，Ella 媽媽一邊說話) 唔好問啦，Ella 心情五好唔想講野。總之我同老師講左叫 Ella 早 D 出 camp 返屋企休息。Ella 宜家好叻，你快 D 較水俾 Ella 沖個涼先啦。

Silvia： OK，mom。

(工人姐姐再把行李箱拖走，入後台。)

Ella： (待工人姐姐走開之後) 我今次真係樣衰到爆，乜面都有曬。

Ella 媽媽： 唔緊要啦，你 D 同學以為你唔舒服啫，Miss Wong 都應承左你唔會同人講囉。最緊要係你個人冇事，冇俾車撞到、冇俾 D 金魚佬拐左去。

Ella : 你真係覺得我會俾金魚佬拐左去，媽咪？你知唔知我幾多歲？
Ella 媽媽： 你幾多歲都好，係媽咪心入面你永遠都係一個 BB，我個寶貝乖女。（*想抱抱 Ella*）
Ella : （*避開媽媽*）我唔係 BB 呀！媽咪，我識嚟 M 架啦！（*稍停*）一日都係你唔好呀！你又唔俾我自己執行李，又逼我帶幾十個真空罐嘅野食，搞到我連 M 巾都有帶！
Ella 媽媽： 呢 D 野一向都係工人姐姐做架啦！冇帶 M 巾係工人姐姐嘅疏忽，我今晚會同佢講。
Ella : 媽咪呀，點解我連真正嘅橙都未見過？咁係邊個嘅疏忽呢？
Ella 媽媽： 真正嘅橙？（*媽媽不明白*）
Ella : 我連未搵開嘅橙都未見過呀，我唔知道橙原本個樣係一個個圓形架，我以為橙係一楷一楷架，我俾全部 friend 笑呀！
Ella 媽媽： 橙係一楷一楷架，你有錯呀，係你 D 同學唔啱，因為 D 咁低 B 嘅野笑你。邊個笑你，你就唔好請佢去你下個月係半島開嘅生日會！
Ella : 媽咪呀，你都識講，「咁低 B 嘅野」，點解我連「咁低 B 嘅野」都唔識？點解我 D 同學個個都識係我唔識？
Ella 媽媽： 識個 D 野有用架！識讀書、考試、彈豎琴、跳芭蕾舞、劍擊、溜冰、打 Hockey、騎馬、德文、西班牙文、水墨畫、辯論，先至有用架嘛！你宜家係求學年紀，一定要將學習放係第一位，咁樣先可以入到一流大學、[讀一流嘅學科、考到一級榮譽畢業、] 做份一流嘅工作、搵個一流嘅老公、生一個一流嘅 BB、過一個一流嘅人生。你一定要好好為將來打算，咁媽咪第日死左之後你先至可以有能力照顧自己
Ella: 自我有記憶以來你就成日咁樣同我講，我唔想再聽啦！（*停頓*）點解我一出世就要擔心你死左之後我點樣生活？我覺得咁樣好癡線囉！好癡呀！
Ella 媽媽： 呢個世界個個父母都會為自己仔女著想架啦！第日你做左人媽咪你就會明架啦。
Ella : 我唔想自己第日變成好似你咁。
Ella 媽媽： 呢個世界就係咁架啦，個個人都係咁樣跟住遊戲規則，照住條程式行架啦，唔跟個個第日一定後悔架。你宜家仲細，你大個左就明架啦。
Ella : 咁有 D 乜野係我宜家會明架！我覺得自己好冇用好白癡呀，我 D 同學個個都識自己照顧自己，而我呢？我就好似個低能兒咁。
工人姐姐： Mom！……Bath tub D 水我較好左啦，毛巾同乾淨衫都放好啦，你要唔要 check 一 check D 水同暖風機個 temperature?
Ella 媽媽： （*向工人點點頭。然後向 Ella。*）好啦 Ella，媽咪知道你今日心情唔好，我地唔好傾呢 D 野住啦，你去沖涼休息先啦。
Ella : 我唔想你再幫我決定咁多野呀媽咪。
Ella 媽媽： OK，咁你想點？
Ella : 我想以後自己嘅事自己處理，唔想媽咪你話嘢事，同埋唔洗工人姐姐咩都幫我做。

Ella 媽媽： 你想炒左工人姐姐呀？你係唔係仲翳緊工人姐姐冇幫你執到 M 巾落行李呀？
工人姐姐： 小姐，sorry 呀，I am so sorry 呀，我今次係有 a little bit careless, 我下次會好 careful 架啦，你唔好炒我呀，我唔可以有左份工架，如果我 jobless 我鄉下 D 屋企人會 starving 架……
Ella: Don't worry Silvia, 我都有話要炒你！我想自己 D 野自己做咋嘛！你以後淨係做家务同幫媽咪得架啦，我搞唔掂先叫你啦！
工人姐姐： oh, sure, sure, 多謝小姐，thank you, thank you! Mom，小姐話唔炒我呀！
Ella: 呀！I have a great idea! 媽咪，下個月個生日會我地唔好去半島開啦！我地係屋企開！我自己整蛋糕！自己整野食招呼自己 D friend！！Yeah! Isn't it a great idea Silvia?! 你宜家快 D 教我整野食啦！
(Ella 拖著 Silvia 離開，Ella 媽媽猶豫，然後跟著離開。)

[Scene 5 – 生日派對，新開始！]

人物：Ella，Alexis，Katherine，Jasmine，班長 Monica，工人姐姐 Silvia，Ella 媽媽
(Ella、Silvia、Ella 媽媽把食物、飲品、蛋糕、裝飾拿出來，為生日排隊準備。)
(同學們來到為 Ella 慶祝生日。)

All： 生日快樂！
Ella： 歡迎大家來到我的生日會，我保證大家今日一定飲飽食醉，Have a wonderful day！
Katherine： Ella，你屋企好舒服啲！
Ella： 多謝！我應該早 D 請你地嚟玩！
Alexis： 嘩！Ella！你唔好話我知呢度全部野食都係你自己整架？！
Ella： 唔係淨係我自己一個整，不過我幫左好多手架！你地一定要俾面食多 D 呀！
Jasmine： 食左肚痛係唔係你包醫藥費先？！
Ella： 搞錯呀，人地生日呀今日，講呢 D 野。真係肚痛先算啦！
Monica： 你叫我地唔好買禮物嚟，所以我地用你個名夾份捐左 D 錢去愛護動物協會。
(Monica 把收據交給 Ella。)
Ella： 嘩！你呢個班長呀，真係次次都係你最聰明啲！多謝你地呀！
Ella： 好！！不如我地即刻開始 party 囉！我好想試下食自己整嘅野呀！
Ella 媽媽： 開始之前，我幫你地影張相先啦！
Ella： 唔洗啦媽咪，你企去後面啦，影 selfie 我最掂架啦！3，2，1 cheese！
(Ella 拿起電話與所有人一起拍 selfie。定格。)

~完~